

TEZAU LITURGIC

14 IUNIE

ACATISTUL SF. CUVIOS METODIE DE LA PEȘNOȘ



MOSCOVA, 2000



Акафист
святому преподобному
Мефодию, игумену
Пешношскому, чудотворцу

Кондак 1

Избранный учениче великаго учителя, богоноснаго чудотворца Сергия, и дивный подражателю жития его святаго, преподобне отче Мефодие, песньми восхваляем тя с любовью, заступника нашего: ты же яко имеяй дерзновение ко Господу, молися выну о спасении нас грешных, от всяких бед избавляя зовущих ти:

Радуйся, преподобне отче наш Мефодие.

Икос 1

Ангелом любезную чистоту от юности твоя возлюбив, преподобне отче Мефодие, к добродетелей подвижнику, преподобному Сергию, в обитель притекл еси, и от него во иночество облеченный, подражатель ревностный

подвигов его был еси. Темже славим тя
воззвании сими:

Радуйся, пустыни доброе прозябение.

Радуйся, чадо истинного послушания.

Радуйся, Евангелиа Христова верный
последователю.

Радуйся, заповедей Иисусовых ревностный
исполнителю.

Радуйся, богоноснаго Сергия присный
учениче.

Радуйся, добродетелей его наследниче.

Радуйся, постом умертвивый в себе
душетленные страсти.

Радуйся, молитвами усердными отразивый
вся искушения диавольская.

Радуйся, возшедый на высоту совершенства
духовнаго.

Радуйся, приникий во глубину смирения
святаго.

Радуйся, слез твоих теченми плодоносивый
ниву душевную.

Радуйся, иже из глубины воздыханми
приобретый чистоту сердечную.

Радуйся, преподобне отче наш Мефодие.

Кондак 2

Видев Всевидец Господь, благое души твоея изволение, отче Мефодие, еже на едине работати Ему в безмолвии пустынном, внуши преподобному Сергию благословити тя на особое пустынное пребывание: ты же, благословение святого с верою прием, в пустыню суровую, в места блатная и непроходимая отшел еси, и тамо поселился еси, един Единому Богу работая в пениих, бдениих и пощениих, немолчно вопия Ему: Аллилуиа.

Икос 2

Разумев произволение Божие, преподобный Сергей, создатися обители иночестей в твоей пустыни, отче Мефодие, прииде к тебе и избра место, удобное на сооружение обители, еже благословив и освятив молитвою своею, заповеда тебе устроить тамо киновию пустынную: ты же заповедь его исполнил еси, и в сооружении храма Божия и обители усердно потрудился еси. О сем тя хвалим и зовем:

Радуйся, безмолвия любителю, пустыню подвиги твоими освятивый.

Радуйся, жестокое пустынное житие
проходивый.

Радуйся, псалмопении немолчными Бога
славивый.

Радуйся, молитвы непрестанная Господеви
возносивый.

Радуйся, постниче не изнемогая, бытием
пустынным питавайся.

Радуйся, трудолюбче нелицемерный,
праздность возненавидевый.

Радуйся, худыя и многошвенная ризы
носивый.

Радуйся, коленопреклонения многия
совершавый.

Радуйся, в терпении и смирении преуспевый.

Радуйся, равноангелен на земли бывый.

Радуйся, обитель пустынную многотрудно
соорудивый.

Радуйся, в ней многия души человеческия
Христу уневестивый.

Радуйся, преподобне отче наш Мефодие.

Кондак 3

Силою Божию укрепляемый, Мефодие преподобне, труды великия подъял еси при созидании обители твоея пустынныйя, дерева секий и здания обители сооружая рукама твоима, и присно моляся ко Господу, да благословит дело рук твоих во славу имени Его Святаго, и на спасение ближних твоих, ихже примером твоим научил еси, неленостно возносити хвалебную песнь Пресвятей Троице: Аллилуиа.

Икос 3

Имея помысл чист и непорочну душу, отче Мефодие, священства благодать достойно восприял еси, и во игумена обители твоея поставленный, ревностно подвизался еси о спасении душевнем Богом врученного тебе стада словесных овец. Сего ради слышиши от нас благохваления таковая:

Радуйся, непорочный олтаря Господня служителю.

Радуйся, достойный Таинств Божественных совершителю.

Радуйся, преподобныя руце твои со дерзновением горе воздеявый.

Радуйся, молитвы благоумиленныя у престола Божия приносивый.

Радуйся, учителю благочестия.

Радуйся, наставниче богомудрия.

Радуйся, древо благосеннолиственное, при водах пустынных возрастшее.

Радуйся, плоды сладкия Христу принесый.

Радуйся, сотворивый и научивый, и велий нареченный во Царствии Небеснем.

Радуйся, за подвиги временнаго жития обретыи покой вечный.

Радуйся, спасения многих душ человеческих виновниче.

Радуйся, ангелонравный человеце.

Радуйся, преподобне отче наш Мефодие.

Кондак 4

Бурю многомятежную житейскаго моря безбедно прешед еси, преподобне, и в пристань безстрастия достигл еси, окормляем заповедми Христа Бога, яже быша светильник ногам

твоим, и свет стезям твоим. Темже ныне в горних обителях водворяешься, и сладце поеши Триединому Богу: Аллилуиа.

Икос 4

Слышавше мнози о богоугодном житии твоём, отче Мефодие, прихождаху к тебе, ови послушати поучений твоих душеполезных, ови же сожителствовати тебе в обители твоей пустынной, ихже ты с отеческою любовию приемля, руководствовал еси стезею правою ко спасению, яко всем звати тебе:

Радуйся, правило веры истинныя.

Радуйся, образе кротости духовныя.

Радуйся, человеце Божий, преподобием украшенный.

Радуйся, воине Христов, полки невидимых врагов победивый.

Радуйся, мира дольного мудрый странниче.

Радуйся, в добродетелех благоискусный подвижниче.

Радуйся, великих пустынножителей верный подражателю.

Радуйся, древних богоносных отец ревностный последователю.

Радуйся, преподобнаго Сергия нравы себе усвоивый.

Радуйся, того житию богоугодному поревновавый.

Радуйся, сыновнюю любовь к нему стяжавый.

Радуйся, и от него зело возлюбленный.

Радуйся, преподобне отче наш Мефодие.

Кондак 5

Боготечное светило быв, всех к солнцу правды Христу путеводил еси, угодниче Божий, словом и примером жития твоего святого, еже все посвящено бысть на служение Богу и ближним твоим: нищия и безкровныя питал еси в обители твоей щедролюбно, и рука твоя никогда оскуде на подавание милостыни тоя требующым. Темже блаженство милостивых унаследовал еси, преподобне отче, и со святыми поеши вечно хвалебную песнь Спасителю Богу: Аллилуиа.

Икос 5

Видим тя, преподобне отче Мефодие, достигшаго в мужа совершенна о Христе и преисполненнаго дарований божественных, в Евангелии Христовом обетованных верным последователем воплощагося Бога Слова. Темже чудящися твоим подвигом, вопием ти хвалебно:

Радуйся, блаженный искателю благ вечных и нетленных.

Радуйся, неусыпный делателю винограда Христова.

Радуйся, обрeтый во глубину сердца твоего бисер драгий Господа Иисуса.

Радуйся, имя Его божественное выну имевый во устах и в сердце твоём.

Радуйся, искренно возлюбивый иго Христово благое и легкое.

Радуйся, терпеливо носивый крест скорбей и лишений пустынных.

Радуйся, алкавый и жаждавый на земли, ныне же насыщайся нетленныя пищи на небеси.

Радуйся, нищету хранивый, да обогатишися дары божественными.

Радуйся, добрый настоятелю общежития иноческаго.

Радуйся, благоискусный врачу болезнующих грехми.

Радуйся, отчески возлюбивый всю о Христе братию твою.

Радуйся, учивый благовременно и безвременно чада твоя духовная богоугождению истинному.

Радуйся, преподобне отче наш Мефодие.

Кондак 6

Проповедник был еси евангельских добродетелей братии твоей, преподобне отче Мефодие, и чада твоя духовная верно руководил еси к Сиону, идеже есть жилище всех спасенных милосердием Христа Бога, пришедшаго в мир спасти падшее человечество, и давшего Своя спасительныя заповеди во спасение всем, иже подобно тебе возлюбиша Его сердцем чистым, и навикоша пети Ему: Аллилуиа.

Икос 6

Возсияв в пустыни твоей яко богосветлое светило, отче Мефодие, светом добрых дел твоих озарил еси души и сердца человеков, искавших от тебе наставитися во спасение. Мнози бо ведяху тя равноангельна житием, и прихождаху к тебе, да слышат от тебе глаголы живота вечнаго. Тебе убо, святому учителю небесныя истины, сотворившему и научившему, и мы смиреннии зовем хвалебно:

Радуйся, Евангелиа Христова немолчный проповедниче.

Радуйся, апостольских преданий ревностный хранителю.

Радуйся, Православия святыя догматы в души твоей добре утвердивый.

Радуйся, верою правою и делы благими Богу угодивый.

Радуйся, во след себе ко Христу приведый собор учеников твоих.

Радуйся, с ними, яко отец со чады, возшедый прияти мзду небесную от Господа.

Радуйся, не сокрывый талант, тебе врученный Всевышним Домовладыкою.

Радуйся, куплю многу им сотворивый,
спасение душ человеческих.

Радуйся, твоими бо ученими грешнии
покаянием Богу угодиша.

Радуйся, твоими бо наставленми заблуждшии
правый путь спасения обретоша.

Радуйся, ближния твоя искренно
возлюбивый.

Радуйся, спасению их душевному усердно
послуживый.

Радуйся, преподобне отче наш Мефодие.

Кондак 7

Хотение едино имел еси, преподобне отче,
еже Богу благоугождати, и спасению душевному
ближних твоих благочестно служити: темже
обитель твоя святая бысть пристанище
благоутишное всякому человеку, треволнением
моря житейскаго утомленному. Ты бо, яко
кормчий бодрый, вся ученики твоя наставляял
еси словом и примером твоим, вдали мира и его
сует, сердцем и усты немолчно возглашати Богу:
Аллилуиа.

Икос 7

Новаго тя Антониа Великаго, наставника душеспасительнаго, познавше, преподобне отче, в пустынной обители твоей, славныя воды моря житейскаго безбедно прешедшаго, и в пристанище безстрастия достигшаго, к нему же и чада твоя духовная благоприятно приводил еси, неленостно и усердно работати Господеви в преподобии и чистоте, научихомся звати тебе:

Радуйся, крине пустыннаго прозябения.

Радуйся, миро Христова благоухания.

Радуйся, пустыню духовно у плодоносивый.

Радуйся, селение иноческое в ней возградивый.

Радуйся, чада послушания и смирения в ней населивый.

Радуйся, отец чадолюбивый учеником твоим бывый.

Радуйся, паству твою словесную упасый на пажитех живоносных Евангелиа Христова.

Радуйся, обитель твою пустынную создавый по преданию святых и богоносных отец.

Радуйся, преподобнаго Сергиа правила и уставы себе усвоивый.

Радуйся, его благословением и молитвою освященный.

Радуйся, дивный учениче дивнаго учителя.

Радуйся, совершенный подражателю совершеннаго о Христе отца твоего духовнаго.

Радуйся, преподобне отче наш Мефодие.

Кондак 8

Странника и пришельца в мире сем помышляя еси себе быти, Мефодие преблаженне, темже о богатстве земном всякое попечение отложил еси, и обитель твою во убожестве зельнем созидал еси, всякое стяжание суетное в ней возбраняя, нищыя же и убогия от трапезы твоя щедролюбно питал еси, разделяя хлеб твой с неимущею братиею, в ихже лице самому Христу служил еси, зовый Ему от любви теплыя: Аллилуиа.

Икос 8

Весь в Бозе быв, отче преподобне, о Бозе и угождении Ему, присно беседовал еси со ученики твоими, и слезы многия изливал еси от

очес твоих при беседах сих, умоляя чада твоя духовная, ничтоже предпочитати паче Любве Христовы. Поминающе убо таковыя твоя душеспасительныя беседы, зовем ти сице:

Радуйся, тихостию словес твоих грешники на покаяние наставивый.

Радуйся, благоумиленною беседою твоею миролюбцы ко Христу обративый.

Радуйся, наставленми твоими богомудрыми сластолюбцы воздержанию научивый.

Радуйся, нищелюбец совершенный бывый.

Радуйся, блаженство нищих духом унаследивый.

Радуйся, образ совершенства о Христе в себе явивый.

Радуйся, нищыя питаваый и упокоеваваый в твоей обители.

Радуйся, во дни глада всем приходившим к тебе пищу подававаый.

Радуйся, последняя укрухи хлеба твоего с неимущими разделяти возжелавый.

Радуйся, любовь твою к Богу, любовию к ближним твоим свидетельствовавый.

Радуйся, Богом возлюбленный и ближними твоими благословляемый.

Радуйся, похвалами молитвенными до днесь в обители твоей почитаемый.

Радуйся, преподобне отче наш Мефодие.

Кондак 9

Всем приходившим в обитель твою святую, молитвы и благословения ради, преподобне отче, дивно бысть видети тя, в раздранной и многошвенной ризе ходившаго, и зело нищетно в келлии твоей пребывавшаго, обаче ты всех равною любовью принимал еси, богатых и убогих, вельмож и простых, и коемуждо слово на пользу душевную изрекал еси, поучая их благочестно служити и благоугождати Богу, верою правою и дела благими, и звати Ему: Аллилуиа.

Икос 9

Ветий премудрых превзошел еси, преподобне отче, благодатным помазанием словес твоих, имиже грешныя на покаяние приводил еси, кающыяся уцеломудрил еси, подвижающыяся в добродетели укрепил еси, и всем путь спасительный ко Христу показал еси, по немуже

сам неуклонно шествовал еси до блаженныя твоя кончины, достойный воистинну похвал таковых:

Радуйся, написавый на скрижалех сердца твоего закон Христов.

Радуйся, от глубины сердечныя износивый добрая и душеспасительная наставления человеком.

Радуйся, яко быша словеса твоя меда сладчайша жаждавшим учения духовнаго.

Радуйся, яко твоими наставленми спасошася мнози.

Радуйся, главо святая, благодатию Божиею осененная.

Радуйся, проповедниче сладкоглаголивый, вещавый словеса жизни вечныя.

Радуйся, пустынный гражданине, грады и веси наполнивый славою твоих подвигов.

Радуйся, маслино Божия благословения, еяже плоды напиташася вернии.

Радуйся, приведый ко Христу ученики твоя, в добродетелех преуспевшыя.

Радуйся, уготовавый учени твоими
Господеви подвижники совершенныя.

Радуйся, воеводо благоискусный полка
иноческаго.

Радуйся, руководителю предобрый
пустынножителей.

Радуйся, преподобне отче наш Мефодие.

Кондак 10

Спасения надежду стяжал еси при исходе
твоом, преподобне отче Мефодие, и яко
пшеница зрелая, во время пожатая, кончиною
благою преселился еси от земли в обители
горния, прияти мзду от руки праведнаго
Мздовоздателя Христа, Иже вчини душу твою
со дуси святых, немолчно возглашающих пред
Престолом славы Его, победную песнь: Аллилуиа.

Икос 10

Царя Небеснаго Христа верный раб и
последователь был еси, отче Мефодие, темже по
неложному Его глаголу: «Идеже есмь Аз, ту и
слуга мой будет», мы чтущии тя, веруем
несомненно, яко ты со Христом в обителях
блаженства вечнаго водворяешься, и радости

нетленные наслаждаешься, яко истинный Того
угодник, от нас же слышиши благохваления сия:

Радуйся, радостно предавай душу твою в
руце Божии.

Радуйся, святую кончину получивый в
возмездие твоим подвигом.

Радуйся, преселившийся от земли к обителем
небесным.

Радуйся, тамо со святыми наслаждайся
блаженства вечнаго.

Радуйся, со ангельскими вои воспевая
Творца ангелов и человеков.

Радуйся, откровенным лицом созерцая славу
Трисияннаго Божества.

Радуйся, телом смертным в обители твоей
погребенный.

Радуйся, душою бессмертною к Сиону
Горнему воспаривый.

Радуйся, плачь неутешен учеником твоим
кончиною твоею сотворивый.

Радуйся, слезами теплыми от них почтенный.

Радуйся, во гробе смиренном от них с
любовию положенный.

Радуйся, чудесы многими прославленный.
Радуйся, преподобне отче наш Мефодие.

Кондак 11

Пение Пресвятей Троице горе приносиши, преподобне отче наш Мефодие, и о обители твоей святей, и подвизающихся в ней, присно ходатайствуеши, прося мира свыше, и благопоспешения во всем благом чадом твоим духовным, от нихже почитаешия достождными похвалы, с пением Тринединому Богу: Аллилуиа.

Икос 11

Светильника ты добрых дел, преподобне отче, исповедуем быти, и прославляем прославльшаго ты Господа, Иже чудесы многими гроб твой ознаменова: струи бо исцелений благодатных источаеши от него недужным, и подвизаеши верныя вопити тебе:

Радуйся, земный ангеле и небесный человеце.

Радуйся, безмезднаго врачевания источниче.

Радуйся, сокровищница даров Божия благодати.

Радуйся, мира многоцелебного преисполненный фиале.

Радуйся, от горних высот к земнородным милостиво приникаяй.

Радуйся, от раки твоея святыя исцеления обильно подаваяй.

Радуйся, скорбящих утешителю.

Радуйся, болящих целителю.

Радуйся, унывающих ободрителю.

Радуйся, бедствующих избавителю.

Радуйся, в сонних и видениях верная посещаяй.

Радуйся, обитель твою святую от всяких бед соблюдаяй.

Радуйся, преподобне отче наш Мефодие.

Кондак 12

Благодать Господню испроси нам, преподобне отче Мефодие, почитающим с любовью святую память твою, и усердно притекающим к честней раце мощей твоих, от неяже чудесная исцеления подаеши недужным. Темже тебе, чудотворения даром от Господа прославленному, прилежно молимся: исцели

наша недуги душевныя и телесныя, и помози нам предстательством твоим спасение вечное получитьи, да вкупе с тобою воспоем Дивному во святых Своих Богу: Аллилуиа.

Икос 12

Поюще подвиги твоя, преподобне отче, ублажаем равноангельное житие твое, дивимся многим чудотворением твоим, молитвенно почитаем святую память твою, и припадающе к раце мощей твоих, умильно глаголем:

Радуйся, Пресвятая Троицы верный служителю.

Радуйся, Пресвятая Богородицы достойный предстоятелю.

Радуйся, ангельских ликом собеседниче.

Радуйся, всех святых сожителю.

Радуйся, пустынножителем славо и похвало.

Радуйся, Российскаго царства духовное украшение.

Радуйся, святых обители твоея присное охранение.

Радуйся, подвижающихся в ней благонадежное заступление.

Радуйся, приходящих в ню на поклонение
благий предстателю.

Радуйся, почитающих святую память твою
небесный покровителю.

Радуйся, душевных недугов благосердный
целебниче.

Радуйся, телесных болезней предивный
врачу.

Радуйся, преподобне отче наш Мефодие.

Кондак 13

О преподобне и богоносне отче Мефодие! Ты
горе на небеси, мы долу на земли, удаленныя от
тебе не толико местом, колико греховною
нечистотою нашею, обаче дерзаем приносить
тебе сие малое похвальное пение, еже
милостивно прием, моли Господа и Владыку
нашего, избавити нас погибели вечныя, и
сподобити блаженства святых, вопиющих Ему
вечно хвалебную песнь: Аллилуиа.

*Этот Кондак читается трижды, затем
Икос 1-й и Кондак 1-й*

Молитва 1

О священная главо, земный ангеле и небесный человеце, преподобне и богоносне отче наш Мефодие! Припадаем к тебе с верою и любовию, и молимся прилежно: яви нам смиренным и грешным святое отеческое твое заступление. Се бо грех ради наших, не имамы свободы чад Божиих просити о потребах наших Господа и Владыку нашего, но тебе, молитвенника благоприятнаго к Нему предлагаем, и просим тя со усердием многим, испроси нам у благости Его благопотребныя дары душам и телесем нашим: веру праву, надежду спасения несомненну, любовь ко всем нелицемерну, в искушениях мужество, в злостраданиих терпение, в молитвах постоянство, душ и телес здравие, земли плодоносие, воздуха благорастворение, житейских потреб довольство, мирное и безмятежное житие, благу христианскую кончину, и добрый ответ на Страшном Суде Христове.

Испроси, угодниче Божий, у Царя царствующих и Господа господствующих нам, вопиющим: страждущую страну Российскую от

лютых безбожник и власти их да свободит, и да возставит престол православных правителей; верных рабов Его. В скорби и печали день и ночь вопиющих к Нему, многоболезный вопль да услышит и да изведет от погибели живот наш.

Не забуди, святче Божий, и обитель твою святую, тобою созданную и присно тя чтущую, но соблюди ю, и всех подвизающихся в ней, и на поклонение в ню приходящих невредимыми от искушений диавольских и всякаго зла. Ей, преподобне отче! Не лиши нас помощи твоея небесная, но молитвами твоими всех нас приведи в пристанище спасения, и наследники яви нас быти всесветлаго Царствия Христова: да поем и славим неизреченная щедроты Человеколюбца Бога, Отца, и Сына, и Святаго Духа, и твое святое заступление, во веки веков. Аминь.

Молитва 2

О великий угодниче Христов и преславный чудотворче, преподобне отче наш Мефодие! Призри на ны грешныя, обуреваемыя треволнением житейских страстей, и к тебе вопиющыя: мы бо чада твоя духовныя, и ограды

твоея словесныя овцы, на тя, по Бозе и Богородице, упование наше возлагаем, и тя со умилением просим; твоим ходатайством ко Господу Богу испроси нам мир, здравие, долгоденствие, воздуха благорастворение, земли плодоносие, дожди благовременны, и вся ны избави от всяких бед: града, глада, потопа, огня, меча, вредоноснаго червья снедающаго плоды земныя, тлетворных ветров, смертоносныя язвы и напрасныя смерти, и во всяких скорбех и печалех наших, буди нам утешитель благий и помощник скорый, сохраняя нас молитвами твоими от падений греховных, и сподобляя наследники быти Царствия Небеснаго. Да прославляем вкупе с тобою всех благ Подателя, в Троице славимаго и покланяемаго Бога, Отца, и Сына, и Святаго Духа, во веки веков. Аминь.

